



14

**ЎЗБЕКИСТОН RESPУБЛИКАСИ ОЛИЙ ВА ЎРТА МАХСУС  
ТАЪЛИМ ВАЗИРЛИГИ**

**Захириддин Мухаммад Бобур номидаги  
АНДИЖОН ДАВЛАТ УНИВЕРСИТЕТИ  
УСТАВИ**

## **I. Умумий қоидалар**

1. Заҳириддин Муҳаммад Бобур номидаги Андижон давлат университети (*Zahiriddin Muhammad Bobur nomidagi Andijon davlat universiteti*) (кейинги ўринларда матнда – университет деб юритилади) Ўзбекистон Республикаси Президентининг 1992 йил 28 февралдаги ПФ-365-сон «Республиканинг янги олий ўқув юртларини ташкил қилиш тўғрисида»ги Фармони асосида Андижон давлат педагогика институти негизида ташкил қилинган ва Олий ва ўрта махсус таълим вазирлиги ташкилий тузилмасига киритилган.

2. Университет давлат олий таълим муассасаси ҳисобланиб, олий таълимнинг асосий ва қўшимча таълим дастурларини бажариш бўйича таълим фаолияти билан шуғулланади, Ўзбекистон Республикасининг қонун ҳужжатларига мувофиқ ўқув-педагогик ва илмий-методик, шунингдек, бошқа фаолиятни амалга оширади ҳамда таълим хизматларини кўрсатади.

3. Университет ўз фаолиятида Ўзбекистон Республикасининг Конституцияси, “Таълим тўғрисида”ги Қонуни, “Кадрлар таёрлаш миллий дастури”, Олий Мажлис палаталарининг қарорлари, Ўзбекистон Республикаси Президентининг фармонлари, қарорлари ва фармойишлари, Вазирлар Маҳкамасининг қарорлари ва фармойишлари, Олий ва ўрта махсус таълим вазирлигининг норматив-ҳуқуқий ҳужжатлари ва кўрсатмалари, шунингдек, мазкур Уставга амал қилади.

4. Университет юридик шахс ҳисобланади. Оператив бошқарувида ўзига хос мол-мулкка эга ва ушбу мол-мулк бўйича ўз мажбуриятларига мувофиқ жавоб беради, ўз номидан мол-мулк сотиб олиши ва мулккий ҳамда номулкий ҳуқуқларни амалга ошириши, зиммасига мажбурият олиши, судда даъвогар ва жавобгар бўлиши мумкин.

Мустақил балансга, банк муассасаларида ҳисоб-китоб ва бошқа, шу жумладан, валюта бўйича ҳисоб рақамларига, Ўзбекистон Республикаси Давлат герби тасвири туширилган ва ўз номи ёзилган муҳрга, штамплар ва бошқа реквизитларга эга.

Университет жойлашган манзил: 170100. Ўзбекистон Республикаси, Андижон шаҳар, Университет кўчаси, 129-уй.

Университетнинг расмий тўлик ва қисқа номи:

давлат тилида: Заҳириддин Муҳаммад Бобур номидаги Андижон давлат университети (АндДУ);

рус тилида: Андижанский государственный университет имени Захириддин Муҳаммад Бабура (АндГУ);

инглиз тилида: Andijan State University named after Zakhiridin Mukhammad Babur (AndSU).

## **II. Университетнинг асосий вазифалари**

2.1. Университетнинг асосий вазифалари қуйидагилардан иборат:

- замонавий педагогик ва ахборот-коммуникацион технологияларни кўллаш асосида бозор иқтисодиёти талабларига мос рақобатбардош, юқори малакали кадрлар тайёрлаш;

- шахсинг интеллектуал, маданий ва маънавий-ахлоқий камол топишига бўлган эҳтиёжларини олий таълим ва олий таълимдан кейинги маълумот олиши орқали эришишни қондириш;

- ҳар томонлама ривожланган ва содиқ шахсни, мустақил давлат фуқаросини, ўз ватани фидойиси, халқ, жамият ва оила олдидаги ўз масъулиятини ҳис қилувчи, миллий ва умуминсоний қадриятларни ҳурмат қилувчи, халқ анъаналарини бойитувчи ва мустақамловчи, Ватанимиз келажаги учун виждонан ва ҳалол меҳнат қилувчи этиб шакллантириш;

- илмий-педагогик ходимлар ва таълим олувчиларнинг тадқиқотлари ва ижодий фаолиятлари орқали фанни тараккий эттириш, олинган натижалардан таълим ва иқтисодий ислохотлар жараёнларида фойдаланиш;

- иқтисодиётнинг мувофиқ соҳаларидаги олий маълумотли мутахассисларни, ўрта махсус, касб-хунар таълим муассасалари илмий-педагогик кадрларини тайёрлаш, қайта тайёрлаш ва малакасини ошириш;

- жамиятнинг ахлоқий, маданий ва илмий қадриятларини сақлаш ва бойитиш;

- аҳоли ўртасида билимларни тарқатиш, унинг маънавий-маърифий ва маданий даражасини ошириш;

- бюджет ва бюджетдан ташқари маблағлардан оқилона фойдаланиш асосида ўқув ва илмий-тадқиқотларнинг моддий-техника базасини ривожлантириш;

- талабалар ва ходимларни ижтимоий ҳимоя қилиш, уларга моддий ёрдам кўрсатиш ва университетнинг озиқ-овқатлар захирасидан кенг фойдаланган ҳолда уларнинг соғлом овқатланишини ўрнатилган тартибда ташкил этиш.

### **III. Ўқув-тарбиявий ва илмий-методик ишларнинг субъектлари, уларнинг ҳуқуқ ва мажбуриятлари**

#### ***а) Талабалар:***

3.1. Университет ректорининг буйруғи билан ўқишга қабул қилинган шахс университетнинг талабаси ҳисобланади. Талабага талабалик гувоҳномаси ҳамда рейтинг дафтарчаси бепул берилади.

Университет талабалари сафига қабул қонунчиликда белгиланган тартибда умумий ўрта, ўрта махсус, касб-хунар таълими маълумотиغا эга бўлган шахслар аризаларига биноан Ўзбекистон Республикаси олий таълим муассасаларига талабаларни қабул қилиш тартиби ва қоидаларига мувофиқ Ўзбекистон Республикаси таълим муассасаларига қабул қилиш бўйича Давлат комиссияси томонидан тест синовлари натижаларига кўра тўпланган балларнинг рейтинг тизими бўйича амалга оширилади.

Олий таълим муассасаларига қабул барча шахслар учун (ҳам грантлар, ҳам тўлов-контракт бўйича) тенг ҳуқуқлилик, ягона қабул қоидалари ва ягона танлов асосида амалга оширилиб, тест синовларида энг юқори балл

тўплаган абитуриентларнинг давлат грантлари бўйича биринчи навбатда қабул қилиниш ҳуқуқи таъминланади. Қолган абитуриентлар тест баллари рейтинги асосида белгиланган тўлов-контракт квоталари доирасида қабул қилиниш ҳуқуқига эгадирлар. Қонунчиликка мувофиқ тест синовларисиз муайян имтиёз асосида ҳам ўқишга қабул қилиш кафолатланади.

3.2. Университетнинг талабалари қуйидаги ҳуқуқларга эга:

- фан, техника, замонавий технологиялар ютуқларига мос келувчи билимлар олиш;

- университет ахборот ресурс марказида мавжуд бўлган китоблар, даврий нашрлар, электрон таълим воситаларидан белгиланган тартибда бепул фойдаланиш;

- бепул маслаҳатлар ва йўл-йўриқлар олиш;

- аудиториялар, таълим жараёнига оид ўқув техник воситалардан ўрнатилган тартибда бепул фойдаланиш;

- таълим жараёни самарадорлиги ва таълим сифатини ошириш юзасидан ўз таклиф-мулоҳазаларини, танқидий фикрларини белгиланган тартибда таълим муассасаси, деканат ва кафедра раҳбариятига билдириш ва уларнинг кўриб чиқилишини талаб қилиш;

- университет ва факультет миқёсида ўтказиладиган маънавий-маърифий ва спорт тадбирларида иштирок этиш;

- илмий-тадқиқот ишларида ва илмий конференцияларда ўрнатилган тартибда фаол қатнашиш;

- университетда қонуний равишда фаолият юритаётган жамоат бирлашмаларига аъзо бўлиш;

- ўқишдан ташқари вақтларда маънавий-маърифий, таъмирлаш, қурилиш, кўкаламзорлаштириш, қишлоқ хўжалик ва бошқа жамоат меҳнатларда, қонунчиликка зид бўлмаган ишларда иштирок этиш.

Талаба сифатли ва юқори савияда билим олиши, танлаган ихтисослиги бўйича юқори малакали мутахассис бўлиб етишиш учун зарур бўлган қонун ҳужжатларига зид бўлмаган бошқа ҳуқуқлардан фойдаланишга ҳақлидир.

Талаба ўз ҳуқуқларини суиистеъмол қилмаслиги, бу ҳуқуқлардан ўзга шахслар манфаатига зид мақсадларда фойдаланмаслиги шарт.

3.3. Давлат грантлари бўйича ва тўлов-контракт асосида ўқитишнинг ишлаб чиқаришдан ажралган ҳолдаги шаклида таълим олаётган талабалар Ўзбекистон Республикаси Вазирлар Маҳкамаси томонидан белгиланган тартиб ва миқдорда стипендия билан таъминландилар.

Талабалар тегишли норматив-ҳуқуқий ҳужжатларга асосан Ўзбекистон Республикаси Давлат стипендиялари қонун ҳужжатларида белгиланган, шунингдек, ўқишга йўллаган юридик ва жисмоний шахслар тайинлаган стипендияларни олиш ҳуқуқига эгадирлар.

3.4. Ўзбекистон Республикаси қонун ҳужжатларига мувофиқ кундузги ўқув шаклида таълим олаётган талабаларга олий таълим муассасасида ўқиётган вақти давомида ҳарбий хизматга чақириш муддатини кечиктириш имкони берилади.

3.5. Университетнинг талабалар турар жойига мухтож талабалар университетнинг талабалар турар жойларидан санитария меъёрлари ва қоидаларига жавоб берадиган жой билан таъминланади. Талабалар турар жойларида тўлайдиган тўловларнинг ҳажми коммунал-маиший хизматлар учун тўловларни инобатга олиб, университет томонидан белгиланади. Турар жойга мухтож талабалар мавжуд бўлган ҳолда, университетнинг талабалар турар жойлари майдонидан бошқа мақсадларда фойдаланиш (ижарага бериш, бошқа келишувлар)га рухсат этилмайди.

Университетнинг талабалари ўқишдан бўш вақтларида ўрнатилган тартибда меҳнат фаолияти билан шуғулланиш ҳуқуқига эга.

3.6. Университетдан четлаштирилган талаба Ўзбекистон Республикаси Вазирлар Маҳкамаси томонидан белгиланган талабалар ўқишини кўчириш, қайта тиклаш ва ўқишдан четлаштириш тартиби ва қоидалари асосида қайта ўқишга тикланилиши мумкин.

Илгари университетдан маъмуриятнинг ташаббуси билан четлаштирилган шахсларни, барча ўқув шакллари бўйича талабалар сафига қайта тиклаш тўлов-контракт асосида амалга оширилади.

Университетнинг талабалари белгиланган тартиб ва қоидалар асосида ўқишини кўчириш (ўқишга қайта тиклаш) ҳуқуқига эга.

Ўзбекистон Республикаси ҳудудида таълим фаолиятини олиб бориш учун лицензияга эга бўлмаган нодавлат олий таълим муассасалари ва бошқа мамлакатлар олий таълим муассасаларининг филиаллари (марказлар, бўлимлар, ўқув-маслаҳат пунктлари ва бошқалар)дан талабаларни университетга ўқишини кўчириш (ўқишга тиклаш) тақиқланади.

3.7. Университет талабалари олий таълимнинг давлат стандартлари, ўқув дастурлари ва режаларида назарда тутилган билимларни эгаллашлари, топшириқларнинг барча турларини белгиланган муддатда бажаришлари зарур ҳамда университетнинг Уставига, Ички тартиб қоидалари, одоб-ахлоқ қоидалари ва талабалар турар жойлари қоидаларига риоя этишлари шарт.

Ўзбекистон Республикаси ҳукумати қарорларида назарда тутилган ҳоллардан ташқари, талабаларни ўқиш вақти ҳисобидан таълим жараёни билан боғлиқ бўлмаган ишларга жалб этиш ман этилади.

3.8. Ушбу Устав, университетнинг Ички тартиб ва одоб-ахлоқ қоидалари ҳамда талабалар турар жойлари қоидаларида назарда тутилган мажбуриятларни бузгани тақдирда талабага нисбатан қуйидаги интизомий жазо чоралари кўрилади: талабалар сафидан четлатиш.

Талаба университетдан қуйидаги ҳолларда четлаштирилиши мумкин:

- а) ўз хоҳишига биноан;
- б) ўқишнинг бошқа таълим муассасасига кўчирилиши муносабати билан;
- в) саломатлиги туфайли (тиббий комиссия маълумотномаси асосида);
- г) ўқув интизомини ва университетнинг Ички тартиб-қоидаларини бузганлиги учун;
- д) бир семестр давомида дарсларни узрли сабабларсиз 74 соатдан ортиқ қолдирганлиги сабабли;

е) ўқиш учун белгиланган тўлов ўз вақтида амалга оширилмаганлиги сабабли (тўлов – кантракт асосида таҳсил олаётганлар учун);

ж) талаба суд томонидан озодликдан маҳрум этилганлиги муносабати билан;

з) вафот этганлиги сабабли.

Ҳарбий хизматни ўташ, саломатлигини тиклаш, ҳомиладорлик ва туғиш, шунингдек болаларни парвариш қилиш таътиллари даврида талабага “Ўзбекистон Республикаси олий таълим муассасалари талабаларига академик таътил бериш тўғрисидаги низом” асосида академик таътил берилиши мумкин.

Университет маъмурияти ташаббуси билан (“е”) талабаларни ўқишдан четлаштириш талабалар касаба уюшмасининг ёзма розилигини инобатга олган ҳолда (касаба уюшмаси аъзоси бўлган талабалар учун) амалга оширилади. Шунингдек, талаба мазкур Уставнинг 3.8-банди “г” кичик бандига кўра четлаштирилаётган ҳолда, университетнинг Ўзбекистон ёшлар иттифоқи бошланғич ташкилоти билан ҳам келишилиши мумкин.

Интизомий жазога тортилаётган талаба ўзига қўлланилган жазо чорасининг қонунийлиги ва адолатлиги юзасидан қонун ҳужжатларида белгиланган тартибда университет ректори, вазирлик ёки судга мурожаат этиши мумкин.

Талаба университетдан четлаштирилганда, унга шахсий ҳужжатлари, белгиланган шаклдаги академик маълумотнома топширилади ва уларнинг нусхаси шахсий йиғмажилдда сақланади.

Интизомий жазо чоралари талабаларнинг касаллик ёки таътилда бўлган вақти ҳисобга олинмаган ҳолда хатти-ҳаракат аниқлангандан сўнг бир ойдан ва хатти-ҳаракат содир этилганидан сўнг олти ойдан кечиктирилмай қўлланилади. Талабалар касаллик пайтида, академик таътил ёки ҳомиладорлик ва туғиш ҳолати билан боғлиқ бўлган таътил пайтларида уларга нисбатан интизомий жазо чораларини кўриш ман этилади.

Талаба касал бўлганлиги ўзи ёки унинг ота-онаси томонидан ёзма ариза билан бевосита деканатга, одатда, бир ҳафтадан кечиктирилмасдан маълум қилинади.

#### ***б) Тингловчилар.***

3.10. Университетда ўрнатилган тартибда малакасини ошираётган шахслар тингловчилар деб ҳисобланади.

#### ***в) Таянч докторантура ва докторантурада таҳсил олувчилар, мустақил тадқиқотчилар.***

3.11. Тегишли фан тармоғи бўйича фалсафа доктори (PhD) илмий даражаси ёки фан доктори (Doctor of Science) илмий даражаси олиш учун олий ўқув юртидан кейинги таълим тизимидаги институтларга қабул қилинганлар таянч докторантура ва докторантурада таҳсил олувчилар ҳисобланади.

3.12. Ўрнатилган тартибда мустақил тадқиқотчи сифатида расмийлаштирилган, фалсафа доктори (PhD) илмий даражаси ёки фан доктори (Doctor of Science) илмий даражаси олиш учун илмий-тадқиқот ишларини бажараётган шахслар мустақил тадқиқотчи ҳисобланади.

3.13. Уларга қўйиладиган малакавий талаблар Ўзбекистон Республикаси қонун ҳужжатлари: Ўзбекистон Республикаси Президенти фармон, қарор, фармойишлари, Вазирлар Маҳкамасининг қонун ости ҳужжатлари, Олий ва ўрта махсус таълими вазирлигининг қонун ости ҳужжатлари асосида белгиланади.

3.14. Университетда педагог ходимлар таркиби, илмий ходимлар, муҳандислик-техника, маъмурий-хўжалик, ишлаб чиқариш, ўқув-ёрдамчи ва бошқа хизматчилар лавозимлари мавжуд.

3.15. Педагог ходимлар лавозимларига ишга қабул қилиш Ўзбекистон Республикаси Вазирлар Маҳкамасининг 2006 йил 10 февралдаги 20-сонли қарори билан тасдиқланган “Олий таълим муассасаларига педагог ходимларни танлов асосида ишга қабул қилиш тартиби тўғрисида”ги Низомга мувофиқ танлов асосида амалга оширилади.

Факультет декани вазирлик билан келишилган ҳолда таълим муассасаси ректорининг буйруғи асосида тайинланади.

Олий таълим муассасасининг проректорлари ректор тавсиясига кўра Ўзбекистон Республикаси Олий ва ўрта махсус таълим вазири томонидан Ўзбекистон Республикаси Президенти девони билан келишилган ҳолда тайинланади.

3.16. Университетнинг педагог ходимлари ва илмий ходимлари қуйидаги ҳуқуқларга эга:

- белгиланган тартибда университет ва факультет Кенгашларига сайлаш ва сайланиш;
- университетнинг фаолиятига тааллуқли масалаларни муҳокама қилишда иштирок этиш;
- университетнинг ахборот-ресурс маркази, ўқув ва илмий бўлинмаларнинг хизматларидан, шунингдек, ижтимоий-маиший, тиббий ва бошқа бўлимлар хизматидан жамоа шартномасига мувофиқ фойдаланиш;
- ўқитишнинг услуб ва воситаларини танлаш, ўқув ва илмий жараённинг юқори сифатини таъминловчи илмий-тадқиқот ишларини амалга ошириш;
- университет маъмуриятининг буйруқ ва фармойишлари юзасидан қонунчиликда белгиланган тартибда мурожаат қилиш;
- қонунчиликда белгиланган тартибда вакант лавозимларга эълон қилинган танловларда қатнашиш;
- ўзлари ишлаётган кафедра, факультетдан ташқари бошқа факультет, кафедра, ташкилотларда ўриндошлик асосида ишлаш (асосий иш жойи билан келишилган ҳолда);
- хорижий ҳамкасбларнинг соҳага доир илмий ва ўқув-услубий адабиётлари билан танишиш ва улар билан фикр алмашиш;
- ўз фани бўйича сифатли дарсликлар ва ўқув қўлланмалар тайёрлаш;
- назарий билимларини, амалий тажрибасини, илмий тадқиқот олиб бориш услубини, педагогик маҳоратини такомиллаштириб бориш;
- талабаларнинг илмий-тадқиқот ишларига раҳбарлик қилиш;
- грантлар, илмий лойиҳалар, хўжалик шартномаларида иштирок этиш;
- Ўзбекистон Республикасининг таълим соҳасига оид қонунчилигида

белгиланган бошқа ҳуқуқлардан фойдаланиш.

3.17. Университетнинг педагог ходимлари ва илмий ходимларининг мажбуриятлари қуйидагилардан иборат:

- университет таълим тўғрисидаги қонунчилик, меҳнат ва технология интизоми, университет Устави, Ички меҳнат тартиби ва одоб-ахлоқ қоидаларига қатъий риоя қилиш, хизмат вазифаларини виждонан бажариш ва ўз шаънига доғ туширмаслик;

- иш жараёнида мулоқот қиладиган муассаса ходимлари, талабалари ва бошқа шахслар билан хушфеъл муносабатда бўлиш;

- иш берувчининг қонуний фармойишларини бажариш, ҳар йили тасдиқланадиган шахсий иш режаси асосида ўқув-услубий, илмий ва маънавий-маърифий ишларни ўз вақтида ва сифатли бажариш;

- ўқув юкнамалари ҳажмини, ўқув-услубий, илмий, ўқув-ташкилий ишларни тасдиқланган шахсий иш режаси асосида бажариш;

- дарслик, ўқув қўлланма ва бошқа ўқув абадиётлар, илмий мақолалар, монографиялар ёзиш;

- тарбиявий ишларни олиб бориш, талабалар билан маънавий-маърифий ишларда, шу жумладан, дарсдан ташқари вақтларда ўтказиладиган тадбирларда бевосита иштирок этиш;

- Кенгаш томонидан тасдиқланган кафедра илмий мавзуларида иштирок этиш;

- ўз малакасини мунтазам равишда ошириш;

- академик лицей ва касб-ҳунар коллежлари учун ҳамкорликда янги авлод ўқув адабиётлари, ўқув-услубий мажмуалар яратишда иштирок этиш;

- академик лицей ва касб-ҳунар коллежларида очик ва муаммоли машғулотлар ҳамда “мастер-класс”лар ўтказиш;

- ўрта махсус ва касб-ҳунар таълими тизими муассасаларида ўтказиладиган маънавий-маърифий тадбирларида иштирок этиш;

- ўрта махсус ва касб-ҳунар таълими тизими муассасаларида замонавий ахборот-коммуникация ҳамда педагогик технологиялар асосида таълим сифатини оширишга кўмаклашиш;

- меҳнатни муҳофаза қилиш, техника хавфсизлиги ва ишлаб чиқариш санитариясига доир қоидаларига риоя қилиш;

- университетнинг мол-мулкани авайлаш, ундан оқилона фойдаланиш;

- иш берувчига бевосита етказилган ҳақиқий моддий зарарни қоплаш;

- университет жамоатчилиги ишларида қатнашиш;

- педагогик ва илмий жараённинг самарадорлигини таъминлаш;

- замонавий цивилизация ва демократия шароитида таълим олувчиларнинг танлаган йўналиши (мутахассислиги) бўйича юксак касбий тайёргарликни, меҳнатга бўлган қобилиятни шакллантириш;

- чет тиллари ва ахборот технологияларидан саводхонлигини ошириб бориш;

- таълим олувчиларда мустақил фикрлаш, ташаббускорлик, ижодий қобилиятни шакллантириш;



- ўзига бириктирилган шогирдлар билан илмий, маънавий-маърифий, тарбиявий ишларни амалга ошириш;
- ўзининг одоби, маданияти, маънавий савияси билан ўрناк бўлиш;
- кийиниш маданиятига риоя этиш;
- республикада амалга оширилаётган ислохотлар ва жаҳонда рўй бераётган янгиликлардан хабардор бўлиш;
- ректорат, факультет, кафедра томонидан ташкил этиладиган маданий, маънавий, маърифий тадбирларда фаол иштирок этиш;
- ўзи ўқитадиган фан дастурини мунтазам фан ва техника ютуқлари асосида бойитиб бориш;
- дарсларни юқори савияда ўтиш;
- фан йўналишига тегишли янги манбаларни топиш ва улар билан талабаларни таништириб бориш;
- ҳар ўқув йили бошлангунга қадар ўзи ўқитадиган фан(лар)нинг ишчи ўқув дастури, календарь режаси ва рейтинг назоратлари жадвалини ишлаб чиқиш ва кафедра мажлисида тасдиқлаш;
- рейтинг тадбирларини ўз вақтида ўтказиш;
- талабалар билимини холисона баҳолаш;
- янги педагогик технологияларни дарс жараёнида қўллаш;
- илмий салоҳият ва педагогик маҳоратини ошириш;
- талабалар илмий-тадқиқот ишларига раҳбарлик қилиш;
- хўжалик шартномалари асосида илмий-тадқиқот ишларини бажариш ҳамда пуллик таълим ва сервис хизматларини кўрсатиш;
- олий таълим тизимида амалга оширилаётган ислохотларда фаол қатнашиш;

3.18. Ушбу Устав, университетнинг Ички тартиб ва одоб-ахлоқ қоидалари, шунингдек, Ўзбекистон Республикасининг меҳнат қонунчилигида назарда тутилган мажбуриятларни бузгани тақдирда педагог ходимга нисбатан Меҳнат кодексига мувофиқ интизомий жазо чоралари кўрилиши мумкин.

Интизомий жазога тортилган педагог ходимларга иш берувчи томонидан хайфсан берилганда бир йил муддатгача қонунда белгиланган имтиёзлардан, мукофот пулларидан ва рағбатлантиришлардан маҳрум этилади. Меҳнати, одоб-ахлоқи билан жамоанинг ишончини қайта оқласа ходимнинг илтимосига биноан, меҳнат жамоаси ёки ходимнинг бевосита раҳбари илтимосномасига кўра бир йил ўтмасдан олдин ҳам ректорнинг буйруғи билан хайфсан олиб ташланиши мумкин. Интизомий жазога тортилаётган педагог ходимлар ўзига қўлланилган жазо чорасининг қонунийлиги ва адолатлилиги юзасидан қонун ҳужжатларида белгиланган тартибда университет ректори, вазирлик ёки судга мурожаат этиши мумкин.

Интизомий жазо чоралар педагог ходимларнинг касаллик ёки таътилда бўлган вақти ҳисобга олинмаган ҳолда хатти-ҳаракат аниқлангандан сўнг бир ойдан ва хатти-ҳаракат содир этилганидан сўнг олти ойдан кечиктирилмай қўлланилади. Педагог ходимларнинг меҳнат таътиллари, касаллик пайтида

ёки ҳомиладорлик ва туғиш ҳолати билан боғлиқ бўлган таътил пайтларда педагог ходимларга интизомий жазо чораларини кўриш ман этилади.

3.19. Университет педагог ходимлари ва талабаларининг чет эл хизмат сафарларига бориши Ўзбекистон Республикасининг қонун ҳужжатларида белгиланган тартибда амалга оширади.

3.20. Университетда педагог-ходимларнинг уч йилда камида бир маротаба малакасини оширилиши таъминланади.

3.21. Университет ходимларининг ҳуқуқ ва мажбуриятлари университетнинг Ички тартиб ва одоб-ахлоқ қоидалари ҳамда лавозим йўриқномалари билан белгиланади.

#### **IV. Ўқув-тарбиявий ва илмий-методик ишлар**

4.1. Университет қуйидаги йўналиш ва мутахассисликлар бўйича олий таълим ва олий ўқув юртидан кейинги таълимнинг асосий таълим дастурлари, кўшимча таълим (кадрларни қайта тайёрлаш ва малакасини ошириш)нинг дастурларини амалга оширади:

а) ишлаб чиқаришдан ажралган ҳолда (бакалаврият), ўқув шакли – кундузги:

- Физика
- Тасвирий санъат ва муҳандислик графикаси
- Педагогика ва психология
- Касб таълими (информатика ва ахборот технологиялари)
- Мусиқа таълими
- Она тили ва адабиёти (қирғиз тили ва адабиёти)
- Миллий ғоя, маънавият асослари ва ҳуқуқ таълими
- Бошланғич таълим ва спорт-тарбиявий иш
- Жисмоний маданият
- Меҳнат таълими
- Филология ва тилларни ўқитиш (ўзбек тили)
- Тарих (мамлакатлар ва минтақалар бўйича)
- Биология (турлари бўйича)
- Кимё
- География
- Математика
- Экология ва атроф муҳит муҳофазаси (тармоқлар бўйича)
- Информатика ўқитиш методикаси
- Мактабгача таълим
- Она тили ва адабиёти (рус тили ва адабиёти (ўзга тилли гуруҳларда))
- Хорижий тил ва адабиёти (инглиз тили)
- Хорижий тил ва адабиёти (немис тили)
- Хорижий тил ва адабиёти (француз тили)
- Меҳнат иқтисодиёти ва социологияси
- Филология ва тилларни ўқитиш (рус тили)

б) магистратура, ўқув шакли – кундузги:

- Психология
- Жисмоний маданият
- Адабиётшунослик (ўзбек адабиёти)
- Ўзбек тили ва адабиёти
- Ўзбекистон тарихи
- Биология (фан йўналиши бўйича)
- Она тили ва адабиёти (рус тили)
- Маънавий асослари
- Математика (йўналишлар бўйича)
- Физика (йўналишлар бўйича)
- Кимё (фан йўналиши бўйича)
- Чет тили ва адабиёти (инглиз тили)
- ва квотада белгиланган бошқа йўналишлар

Университетда кадрлар истеъмолчилари талаблари асосида ўрнатилган тартибда янги йўналиш ва мутахассисликлар бўйича кадрлар тайёрланишини ташкил этиш мумкин.

4.2. Университет таълимнинг асосий таълим дастурларини икки босқичда амалга оширади: бакалаврият ва магистратура.

Бакалаврият – таълим йўналиши бўйича фундаментал ва амалий билимлар берувчи, ўқиш муддати 4 йилдан кам бўлмаган таянч олий таълимдир.

Бакалаврат дастурини тугатган битирувчиларга давлат аттестацияси яқунлари асосида таълим йўналиши бўйича «бакалавр» даражаси берилади ҳамда давлат намунасидаги диплом топширилади.

Магистратура – йўналишнинг муайян мутахассислиги бўйича фундаментал ва амалий билимлар берувчи, бакалаврият негизида, ўқиш муддати 2 йилдан кам бўлмаган олий таълимдир.

Магистратура дастурини тугатган битирувчиларга давлат аттестацияси яқунлари асосида муайян мутахассислик бўйича «магистр» даражаси берилади ва давлат намунасидаги диплом топширилади.

Бакалавр ва магистрлик давлат намунасидаги диплом унинг эгаларига касбий фаолият билан шуғулланиш ёки танланган таълим йўналишига ва мутахассислигига мувофиқ таълимнинг навбатдаги турлари бўйича ўқишни давом эттириш ҳуқуқини беради.

Олий таълимнинг турли босқичида асосий таълим дастурлари бўйича дастлабки таълим олиш, иккинчи олий таълим олиш сифатида қаралмайди.

4.3. Университетда таълим жараёнини ташкил этиш, таянч олий таълим муассасаси томонидан ишлаб чиқилган ва ўрнатилган тартибда тасдиқланган ўқув режалари ва фанларнинг дастурлари, университет ректори томонидан тасдиқланган йиллик ўқув жараёни жадвали ҳамда машғулотлар жадвали билан тартибга солинади.

Таълим жараёнини мақсадли йўналтириш йўли билан ташкил этиш, яъни таълим шакллари, услуб ва воситаларни танлаш йўли билан университет талабаларига олий таълимнинг асосий касбий таълим

дастурларини ўзлаштириш учун зарурий шароитларини яратиб берилиши лозим.

Таълим-тарбия жараёнининг бирлиги олий таълимнинг давлат таълим стандартлари билан таъминланади.

4.4. Университетда ўқув машғулотларининг қуйидаги асосий турлари белгиланган: маъруза, консультация, семинар, амалий машғулот, лаборатория иши, яқка машғулот (амалий ижрочилик билан боғлиқ бўлган санъат йўналишларида), назорат иши, коллоквиум, мустақил иш, амалиёт, курс лойиҳаси (курс иши), бакалаврлик битирув малакавий иши ҳамда магистрлик диссертацияси.

Аудитория машғулотларининг барча турлари учун 45 (ёки 40 минутлик танаффуссиз қўшма маъруза) дақиқалик академик соат белгиланган. Ўқув машғулотлари орасидаги танаффус камида 10 дақиқа бўлади.

Таълим ва тарбия олиб бориладиган тиллар: ўзбек, рус, қирғиз ва инглиз тиллари ҳисобланади.

4.5. Университетда кадрлар тайёрлаш ишлаб чиқаришдан ажралган ёки ажралмаган ҳолда олиб борилади.

Олий таълимнинг асосий касбий таълим дастури доирасида таълим олишнинг барча шакллари учун ўрнатилган тартибда ишлаб чиқилган ва “Ўзстандарт” агентлигида давлат рўйхатидан ўтказилган давлат таълим стандарти қўлланилади.

4.6. Университетда ўқув йили икки семестрга бўлинади ва унинг ҳар бирида талабаларнинг ўзлаштириши рейтинг назорати шаклида олиб борилади.

Ўзлаштирувчи талабаларни курсдан курсга ўтказиш факультет деканининг тавсиясига биноан ректор буйруғи билан амалга оширилади. Талабаларни курсдан курсга шартли ўтказиш мумкин эмас.

Олий таълимнинг таълим дастурларини ўзлаштириш, Олий ва ўрта махсус таълим вазирлиги томонидан тасдиқланган ва Адлия вазирлигидан давлат рўйхатидан ўтказилган “Олий таълим муассасалари талабалари билимини назорат қилиш ва баҳолашнинг рейтинг тизими тўғрисидаги низом”га мувофиқ тартибга солинади, “Ўзбекистон Республикаси олий таълим муассасалари битирувчиларининг якуний давлат аттестацияси тўғрисидаги низом”га асосан битирувчиларнинг якуний аттестацияси билан тугалланади.

4.7. Университетда илғор педагогик ва ахборот технологиялари, таълимни индивидуаллаштириш ва мустақил таълим олиш воситаларини, модул тизими ҳамда масофавий таълим беришни қўллаш ҳисобига мутахассислар тайёрлаш сифатини оширишга йўналтирилган илмий-услубий ишлар амалга оширилади.

**4.8. Олий ўқув юртидан кейинги таълим** – жамиятнинг олий малакали илмий ва илмий-педагогик кадрларга бўлган эҳтиёжини таъминлашга йўналтирилган узлуксиз таълим тури ҳисобланади.

4.9. Университетда олий ўқув юртидан кейинги таълим Ўзбекистон Республикаси ҳукумати томонидан қабул қилинган меъёрий-ҳуқуқий ҳужжатлар ва белгиланган тартибларга мувофиқ амалга оширилади.

## **V. Университетнинг таркиби**

5.1. Университетнинг таркибига қуйидагилар киради:

- а) факультетлар;
- б) кафедралар;
- в) бошқармалар;
- г) бўлимлар;
- д) илмий лабораториялар;
- е) марказлар

Университет таркиби (факультетлар, кафедралар, илмий лабораториялар, бўлимлар ва марказлар номлари) Олий ва ўрта махсус таълим вазирлиги билан келишган ҳолда университет Кенгаши томонидан тавсия этилиб, вазир буйруғи билан тасдиқланади ва ушбу уставга илова қилинади.

5.2. Университет қошида академик лицейлар фаолият олиб бориши мумкин.

Академик лицейлар мақоми, фаолияти, сони Ўзбекистон Республикаси ҳукуматининг норматив-ҳуқуқий ҳужжатлари асосида белгиланади.

## **VI. Университетни бошқариш**

6.1. Университетни бошқариш Ўзбекистон Республикаси қонунчилиги ҳамда ушбу Уставга мувофиқ яқка раҳбарлик ва университетнинг Кенгаши, Васийлар кенгаши орқали жамоатчилик бошқарувини уйғунлаштириш тамойили асосида амалга оширилади.

6.2. Университетни бевосита бошқариш Ўзбекистон Республикаси Президентининг 1992 йил 9 мартдаги 137-сонли Фармойишида белгиланган тартиб асосида тайинланган ректор томонидан амалга оширилади.

6.3. Ректор университет фаолиятига, шунингдек, университетнинг Устави, Ички тартиб ва одоб-ахлоқ қоидалари, Олий таълим тўғрисидаги Низом ҳамда мазкур Уставда белгиланган мажбуриятлар учун тўла масъулдир.

6.4. Ректор Ўзбекистон Республикаси қонунчилигига мувофиқ университет номидан ишончномасиз иш олиб боради, барча идоралар, муассасалар, корхоналарда унинг вакили сифатида қатнашади, университетнинг мол-мулкига масъуллик қилади, шартномалар тузади, ишончномалар беради, банк муассасаларида университетнинг ҳисоб

рақамларини очади, молиявий маблағлардан ўрнатилган тартибда фойдаланиш бўйича фармойишлар беради.

6.5. Ректор университетнинг ваколати доирасида:

- университетнинг барча ходимлари, талабалари ва бошқа таълим олаётганлар учун мажбурий бўлган буйруқлар чиқаради ва топшириқлар беради;

- Олий ва ўрта махсус таълим вазирлиги билан келишган ҳолда факультет деканлари ва бош бухгалтери лавозимига тайинлайди ҳамда лавозимидан озод қилади

- университет проректорлари лавозимига номзодларни тавсия этади ва проректорлар, деканларнинг муайян вазифалари ҳамда масъулиятларини белгилайди;

- университет ходимларини Ўзбекистон Республикаси меҳнат қонунчилиги ва Вазирлар Маҳкамаси томонидан белгиланган тартибда ишга олиш ва бўшатишни амалга оширади;

- университет таркибига кирган илмий-тадқиқот, тажриба-экспериментал ҳамда бошқа ташкилот ва бўлинмаларнинг вазифаларини белгилайди ва улар тўғрисидаги низомларни тасдиқлайди;

- университет ходимларининг лавозим маошларига ҳар ойлик устамалар ва қўшимчаларни белгилайди;

- касаба уюшма кўмитаси ёки университетнинг бошқа ваколатли органи билан келишган ҳолда Ички тартиб ва одоб-ахлоқ қоидаларини тасдиқлайди;

- университетда намунавий штат бирликларига мувофиқ ажратилган маблағлар ҳамда иш ҳақи фонди, университет ходимларининг сони ва лавозим маошлари, тариф сеткаси доирасида университет педагог ходимлари таркиби ва университет ходимларининг штат бирлигини тасдиқлайди ҳамда лавозим маошларини белгилайди;

- университет Кенгашининг тавсиясига кўра ўрнатилган тартибда тегишли норматив-ҳуқуқий ҳужжатларга мувофиқ факультетларни, кафедраларни очиш ёки ёпиш қарорларини тасдиқлайди.

6.6. “Олий таълим муассасаси кафедраси тўғрисида Низом” талабларидан келиб чиққан ҳолда университет Кенгашининг тавсиясига кўра кафедралар ташкил этилади ёки тугатилади.

6.7. Университет ректорига ўзи ишлаётган олий таълим муассасаси ва ундан ташқарида ҳақ тўланадиган бошқа раҳбарлик лавозимида (илмий ва илмий-методик раҳбарликдан ташқари) ўриндошлик бўйича ишлашга рухсат этилмайди. Ректор ўз вазифаларини ўриндошлик бўйича бажариши мумкин эмас.

6.8. “Олий таълим тўғрисидаги Низом”га мувофиқ университет фаолиятининг асосий масалаларини кўриш учун Кенгаш ташкил этилади.

Кенгаш таркибига ректор, проректорлар, факультетлар деканлари ҳамда кафедралар мудирлари, бўлим бошлиқлари, шунингдек, талабалар ва университет ходимлари, касаба уюшмаси кенгаши вакиллари киради. Кенгашнинг бошқа аъзолари умумий мажлисда (конференцияда) яширин овоз бериш йўли билан сайланади. Ректор кенгаш раиси ҳисобланади.

Педагог ходимлар таркибидан Кенгашга сайланадиганлар сони ректор буйруғи билан белгиланади.

6.9. Кенгашнинг ваколати, уни сайлаш ва фаолият юритиш тартиби, таълимни бошқариш бўйича ваколатли давлат органи томонидан тасдиқланган “Олий таълим муассасасининг Кенгаши тўғрисидаги Низом” билан белгиланади.

6.10. Университетда Васийлар кенгаши – университетни бошқарувчи жамоатчилик органи ташкил этилади ва унинг таркибига муассис-вазирликлар, маҳаллий ҳокимият, ишбилармон доиралар, жамоатчилик ташкилотлари, жамғарма ва васийлар, бошқа таълим муассасаларининг вакиллари киради.

Васийлар кенгашининг таркиби, ваколатлари, шакллантириш таркиби ва фаолияти “Васийлар кенгаши тўғрисидаги Низом” билан белгиланади.

6.11. Университетда касаба уюшмалари ва бошқа жамоатчилик ташкилотлари фаолият кўрсатади. Талабалар ва ходимлар манфаатларини ҳимоялашни ходимлар ва талабаларнинг вакиллари сифатида университетда сайланган органлар амалга оширади. Талабалар ва ходимларнинг ваколат органларининг ҳуқуқлари ва уларга нисбатан университет маъмуриятининг мажбуриятлари қуйидагилардир:

- ходимлар вакиллик органларининг ҳуқуқларига риоя қилиш, уларнинг фаолиятига кўмаклашиш;

- ходимларнинг манфаатларига тааллуқли қарорлар қабул қилишдан олдин уларнинг вакиллик органлари билан маслаҳатлашиш, меҳнат тўғрисидаги қонунлар ва бошқа норматив-ҳуқуқий ҳужжатларда кўрсатилган ҳолларда эса уларнинг розилигини олиш;

- ходимлар вакиллик органларининг таклифларини ўз вақтида кўриб чиқиш ва қабул қилинган қарорлар ҳақида уларга ёзма равишда асосли жавоб бериш;

- ходимларнинг вакиллик органлари аъзоларини корхонага, манфаатлари ифода этилаётган ходимларнинг иш жойларига монеликсиз қўйиш;

- ходимларнинг вакиллик органларига меҳнат, университет фаолияти масалаларига ва бошқа ижтимоий-иқтисодий масалаларга доир ахборотни текин бериш;

- ходимларнинг вакиллик органларига ўз вазифаларини бажаришлари учун зарур шароит яратиб бериш;

- ходимларнинг вакиллик органларига нисбатан меҳнат тўғрисидаги қонунлар ва бошқа норматив ҳужжатларда назарда тутилган бошқа мажбуриятларни бажариш.

6.12. Амалдаги низомларга мувофиқ университетда илмий ва ихтиёрий жамиятлар, илмий-услубий, илмий-техник кенгашлар ва комиссиялар, ёш олимлар кенгаши ва бошқалар ташкил этилиши мумкин.

6.13. Ректорат ва Кенгаш ўз фаолиятида университет жамоатчилик ташкилотларининг тавсияларини кўриб чиқади ва ўз фаолиятларида уларни ҳисобга олади.

6.14. Университет факультетини Олий ва ўрта махсус таълим вазирлиги билан келишилган ҳолда ректор томонидан тайинладиган декан бошқаради.

Факультет декани ўз фаолиятида “Олий таълим муассасасининг факультети тўғрисида Низом”га амал қилади.

6.15. “Олий таълим муассасасининг факультети тўғрисида Низом”га мувофиқ факультетда Кенгаш ташкил этилиши мумкин.

Кенгашнинг таркиби, ваколатлари, шакллантириш ва фаолиятининг тартиби “Олий таълим муассасаси факультетининг Кенгаши тўғрисидаги Низом” билан белгиланади.

6.16. Кафедра фаолиятига Ўзбекистон Республикаси Вазирлар Маҳкамаси томонидан тасдиқланган низомга мувофиқ танлов асосида университетнинг Кенгаши томонидан сайладиган мудир раҳбарлик қилади.

Кафедра мудирининг ваколатлари ва кафедра фаолиятининг тартиби “Олий таълим муассасасининг кафедраси тўғрисидаги низом” билан белгиланади.

## **VII. Молия – хўжалик фаолияти ва моддий-техник базаси**

7.1. Университетга ушбу Уставда назарда тутилган фаолиятни амалга ошириш мақсадида оператив бошқариш ҳуқуқи билан давлат (таъсисчи) томонидан бинолар, иншоотлар, мулкӣ мажмуалар, университетнинг паспортига мувофиқ асбоб-ускуналар, шунингдек, истеъмол, ижтимоий, маданий ва бошқа мақсадлар учун зарур бўлган мулклар бириктирилган.

7.2. Университет фақат Ўзбекистон Республикаси Вазирлар Маҳкамасининг қарори билан амалга ошириладиган давлат тасарруфидан чиқариладиган ва хусусийлаштириладиган объектлар қаторига киритилган. Университетга ажратилган ер участкалари университетга муддатсиз текин фойдаланиш учун бириктирилган.

7.3. Университетга жисмоний ва юридик шахслардан совға, ҳадя, хомийлик ёки васият бўйича берилган пул маблағлари, мол-мулк ва бошқа мулкӣ объектларга, университет фаолиятининг самараси ҳисобланган интеллектуал ва ижодий маҳсулотларга, шунингдек, ўз фаолияти орқали оладиган даромадлар ва бу даромадлар ҳисобидан сотиб олинладиган мулкӣ объектларга эгалик қилиш ҳуқуқи берилган.

7.4. Университет мол-мулкни ижарага олувчи ва мол-мулкни ижарага берувчи сифатида фаолият кўрсатиш ҳуқуқига эга. Ўзбекистон Республикасининг Фуқаролик кодекси, ижара тўғрисидаги қонун ва Ўзбекистон Республикаси Вазирлар Маҳкамаси томонидан тасдиқланган “Давлат мулкни ижарага бериш тартиби тўғрисида Низом”га мувофиқ университет ўзига бириктирилган ижарага берилиши қонун ҳужжатларига зид бўлмаган бинолар, иншоотлар ва уларнинг қисмлари, асбоб-ускуналар, транспорт воситалари шаклидаги давлат мулки ва бошқа мол-мулкларни Кенгашнинг розилиги билан тасарруф этиш ҳуқуқисиз, белгиланган нархлар бўйича ижарага беришни амалга оширади.



7.5. Ижара ҳақи сифатида олинган маблағлар таълим жараёнини таъминлаш ва уни ривожлантириш учун фойдаланилади.

7.6. Университетнинг таълим фаолиятини молиявий таъминлаш давлат грантлари асосида мутахассислар тайёрлаш учун ажратилган бюджет маблағлари, давлат томонидан белгиланган нормативлардан келиб чиққан ҳолда қайта тайёрлаш ва ходимларнинг малакасини ошириш ҳисобига ажратилган маблағлар, шунингдек, бюджетдан ташқари маблағлар, жумладан талабалар ва тингловчиларни ўқитиш учун белгиланган тартибда олинган тўлов-шартнома асосидаги маблағлар ва тадбиркорлик тушумлари ҳисобидан амалга оширилади.

7.7. Университет асосий фаолиятига зарар етмайдиган тартибда таълим ҳамда бошқа соҳаларда пуллик таълим ва сервис хизматларини амалга ошириши мумкин. Университет шуғулланадиган тадбиркорлик фаолияти унинг Уставида белгиланган вазифаларга мос келиши шарт.

7.8. Университет ўз мулки билан хўжалик жамиятлари ва ширкатларнинг устав жамғармасида қатнашиш, пуллик таълим хизматлари, консалтинглар ва бошқа хизматлар учун нархларни белгилаш, солиқ ва қонунчиликда назарда тутилган бошқа мажбурий тўловлардан сўнг қолган даромадни мустақил тасарруф этиш ҳуқуқига эга.

7.9. Университет пуллик таълим хизматлари кўрсатишни бюджетдан ажратиладиган маблағлар ҳисобидаги таълим фаолияти доирасида ва унинг ўрнига амалга ошириши мумкин эмас.

7.10. Университет Ўзбекистон Республикаси қонунчилигига ҳамда мазкур уставга зид бўлмаган шартномаларни тузиш, мажбуриятлар ва бошқа шартларни белгилаш бўйича масалаларни мустақил ҳал қилади.

7.11. Университетда лавозим маошлари “Олий таълим муассасалари ходимлари меҳнатига ҳақ тўлаш тўғрисида Низом” ва меҳнатга ҳақ тўлашнинг ягона тариф сеткасига мувофиқ белгиланади. Университет ходимига лавозим маоши (ставка) ўз функционал вазифаларни ҳамда меҳнат шартномасида назарда тутилган ишларни бажарганлиги учун тўланади. Қўшимча маош, устама ва бошқа моддий рағбатлантириш тадбирларининг ҳажмини университет мустақил, моддий рағбатлантириш фонди доирасида қонунчиликда назарда тутилган тартибда ва ҳажмда белгилайди.

7.12. Белгиланган меҳнат ҳақи махсус ишчи гуруҳ хулосасига кўра фақат уни ошириш мақсадида қайта кўриб чиқилиши мумкин.

7.13. Университетда ташкил этилган жамоат ташкилотларига фаолият кўрсатишлари учун зарур бўлган хоналарни ажратади ва уларни тозалашни ташкил этади.

7.14. Университетдаги тиббий-санитар муассасасига, шунингдек, унинг ҳудудида жойлашган ёки университетнинг балансида бўлган ҳамда талаба, тингловчи ва ходимларга хизмат кўрсатувчи ошхона ва бошқа умумий овқатланиш муассасаларига иситиш, ёритиш ва сув таъминоти билан таъминланган хоналар ажратилади.

7.15. Университетнинг тегишли биноларини таъмирлаш, реконструкция қилиш ёки янгиларини қуриш, уларнинг молиявий таъминоти қонунчиликда белгиланган тартибда амалга оширилади.

### **VIII. Халқаро ҳамкорлик**

8.1. Университет Ўзбекистон Республикаси “Таълим тўғрисида”ги Қонунининг 33-моддасига мувофиқ таълим муаммолари юзасидан халқаро ҳамкорликда иштирок этади, чет давлатларнинг тегишли ўқув юртлари билан бевосита алоқалар ўрнатиш, қонун ҳужжатларида белгиланган тартибда улар билан қўшма ўқув юртлари ташкил этиш ҳуқуқига эга.

8.2. Чет эл фуқароларини тайёрлаш, қайта тайёрлаш ва уларнинг малакасини ошириш, таълим муассасаси илмий-педагогик ходимларининг Ўзбекистон Республикаси ҳудудидан ташқарида педагогик фаолият ва илмий-тадқиқот ишлари билан шуғулланишлари давлатлараро органнинг хорижий давлатларнинг таълимни бошқариш бўйича тегишли органлари орасидаги шартномалари, шунингдек, университетнинг қонунчиликка мувофиқ чет эл фуқаролари ва хорижий юридик шахслар билан бевосита тузган шартномалари асосида амалга оширилади.

8.3. Университет қуйидаги ҳуқуқларга эга:

- халқаро нодавлат ташкилотларга кириш;
- Ўзбекистон Республикасининг халқаро шартномалари деб қаралиши мумкин бўлмаган, хорижий шериклар билан ҳамкорликдаги фаолият тўғрисида белгиланган тартиб асосида шартномалар тузиш;
- хорижий шериклар иштирокида университетнинг таркибий бўлинмалари (марказлар, лабораториялар, техник парклар ва бошқа бўлинмалар)ни қонунчиликда кўзда тутилган тартибда ташкил этиш.

8.4. Университет Ўзбекистон Республикасининг қонунчилигига мувофиқ ушбу Уставда назарда тутилган ва “Таълим тўғрисида”ги қонуни ҳамда Кадрлар тайёрлаш миллий дастурида белгиланган вазифаларни бажаришга, шунингдек, халқаро алоқаларни ривожлантиришга йўналтирилган ташқи иқтисодий фаолият билан шуғулланиш ҳуқуқига эга.

8.5. Университетнинг ташқи иқтисодий фаолиятдан тушган валюта, моддий тушумлари қонунчиликка биноан унинг Уставида белгиланган фаолиятини таъминлаш учун ишлатилади.

### **IX. Яқуний қондалар**

9.1. Университет Ўзбекистон Республикасининг қонунчилигида белгиланган тартибда қуйидагиларга жавоб беради:


- унинг ваколатига киритилган вазифаларни бажармаганлиги;
- таълим жараёнида ўқув режа ва жадвалларга мувофиқ таълим дастурлари ҳажмини тўлиқ бажармаганлиги;
- таълим жараёни вақтида университетда таълим олувчилар ва ходимларининг ҳаёти ва соғлиғи;
- таълим олувчилар ва университет ходимларининг ҳуқуқ ва эркинликларининг бузилганлиги;

- Ўзбекистон Республикасининг қонунчилигида назарда тутилган бошқа хатти-ҳаракатлар.

9.2. Университет Ўзбекистон Республикаси қонунчилигига мувофиқ Ўзбекистон Республикаси Вазирлар Маҳкамаси томонидан белгиланган тартиб асосида қайта ташкил қилиниши ёки тугатилиши мумкин.

9.3. Ушбу Устав университет Кенгаши томонидан 2017 йил \_\_\_\_ даги \_\_\_\_ – сонли йиғилишида кўриб чиқилган ва маъқулланган.

9.4. Университет Уставига қўшимча ва ўзгартиришлар киритиш белгиланган тартибда амалга оширилади.

Ректор:   
Ҳадашев Акрам  
Султанмуратов

2017 yil 07 oyning 11 -kuni MEX. ANDIJON VILOYATI ANDIJON  
SHARHAT 9 SONLI DAVLAT NOTARIAL IDORASINING NOTARIUSI O.SH.KABAMINOV, FUGARO  
Shayxulloh Ahamadovning Oltin qabriga  
NING MENING HUZURIMDA QO'TAN HISSASINING HAQIQIYLIGINI SHARHATLAYMAN  
HUJJATNI IMZOLOVCHISINING SHAKSI ANIQLANDI, MUOMALAGA LAYOQATLILIGI  
TEKSHIRILDI, YA'NI SHAKSIY MULOQAT DAVRIDA UNING MUOMALAGA LAYOQAT-  
LILIGI SHUBHA TUG'DIRMADI. USHBU NOTARIAL HARAKATNI AMALGA OSHIRISH  
DAVRIDA NOTARIAL IDORADA UNING MUOMALAGA LAYOQATSIZLIGI HAQIDA HICH  
QANDAY MA'LUMOT YO'Q.

KECHTIDA 1-1849 RAQAM BILAN QAYD ETILDI  
2996, 50, 607-608 HISSASINING DAVLAT BOJI UNG'ILDI



*O. Sh. Kabaminov*  
O.SH.KABAMINOV



Notary of the Andijan Region State Notary Office, No. 9  
O. Sh. Kabaminov  
10

*O. Sh. Kabaminov*